

উম্মতের দরদ ও দাওয়াতের হুকুম

দা'য়ী সর্বদা উম্মতের ফিকির করবে। উম্মতের দরদ আল্লাহ পাকের কাছে খুবই প্রিয়। আমাদের প্রিয় নবীজি সাল্লাল্লাহু আলাইহি ওয়া সাল্লামের একটি বড় সিফাত ছিল **دَائِمُ الْفِكْرِ** 'উম্মতের ফিকির'। তিনি সর্বদা উম্মতকে নিয়ে ভাবতেন। উম্মতের ফিকিরে তিনি থাকতেন অস্থির ও ব্যাকুল। উম্মতের ফিকির আল্লাহর কাছে এমন প্রিয়, যারা নবীজির পূর্বে উম্মতের ফিকির করেছেন, আল্লাহ তাআলা তাদের নাম কুরআন পাকে স্থান দিয়েছেন। যেমন হজরত নুহ আ., ইব্রাহিম আ., মুসা আ., দাউদ আ. প্রমুখ।

সূরা ইয়াসিনে হাবিবে নাজ্জারের দিকে লক্ষ্য করে আয়াত নাজিল করা হয়েছে। এক শহরে তিনজন নবী দাওয়াতি কাজে গেলেন। সেই জাতি নবীদের ডাকে সাড়া দিচ্ছিল না। এমনকি তাদের ওপর আক্রমণের পরিকল্পনাও করছিল। এই খবর হাবিবে নাজ্জারের কাছে পৌঁছলে তিনি অন্তরে দরদ ও ব্যাকুলতা নিয়ে শহরের একপ্রান্ত থেকে দৌড়ে এলেন। তার জাতিকে আগুন থেকে বাঁচানোর জন্য। তাঁর জাতিকে সম্বোধন করে বললেন—

[اتَّبِعُوا مَنْ لَا يَسْأَلُكُمْ أَجْرًا وَهُمْ مُهْتَدُونَ]

তোমরা এমন লোকের অনুসরণ কর যারা কোনো প্রতিদান চায় না এবং তারা নিজেরা হেদায়াতপ্রাপ্ত।^১

তার জাতি যেন নবীদের সাথে অসৎ আচরণের কারণে ধ্বংস না হয়ে যায়—এই ফিকির নিয়ে দৌড়ে এলেন। আল্লাহ তাআলার কাছে তার এই ফিকির ও দরদ এতো পছন্দ হলো, আল্লাহ তাআলা তার দিকে ইঙ্গিত করে আয়াত অবতীর্ণ করলেন।

আরও একটি ঘটনা

ক্ষুদ্র কোনো প্রাণীর নাম নিতে বললে আমরা পিপীলিকার নাম নিই। একদিন সুলায়মান আ. তার সৈনিকদল নিয়ে একদিকে যাচ্ছিলেন। পিপীলিকার সর্দার তাদের ডেকে বললো, তোমরা তোমাদের বাসস্থানে প্রবেশ করো। অন্যথায় তোমরা তাদের পদতলে পিষ্ট হবে, এমনকি তারা অনুভবও করতে পারবে না। আল্লাহর কাছে স্বজাতির প্রতি পিপীলিকার এই দরদ এতো প্রিয় হলো যে, আল্লাহ তাআলা তার কালামে পাকে এই পিপীলিকার নামে একটি সূরা অবতীর্ণ করলেন। নাম দিলেন 'সূরা তুননামল'। আল্লাহ তাআলা বলেন—

قَالَتْ ثَمَلَةٌ يَا أَيُّهَا النَّمْلُ ادْخُلُوا مَسَاكِنَكُمْ لَا يَحْطِمَنَّكُمْ سُلَيْمَانُ وَجُنُودُهُ وَهُمْ لَا يَشْعُرُونَ

পিপীলিকাটি বলল, হে পিপীরা! তোমরা তোমাদের গর্তে প্রবেশ কর, অন্যথায় হযরত সুলাইমান আ. ও তাঁর বাহিনী তোমাদেরকে পিষে ফেলবে। এমতাবস্থায় তারা অনুভবও করতে পারবে না।

যেই কুরআনে তাদের নাম এসেছে, সেই কুরআন সম্পর্কে আল্লাহ তাআলা বলেন—

لَوْ أَنزَلْنَا هَذَا الْقُرْآنَ عَلَى جَبَلٍ لَّرَأَيْنَاهُ خَاشِعًا مُّتَصَدِّعًا مِّنْ خَشْيَةِ اللَّهِ وَتِلْكَ الْأَمْثَالُ لِنُضَرِّهَا لِلنَّاسِ لَعَلَّهُمْ يَتَفَكَّرُونَ {

আমি যদি এই কুরআনকে কোনো পাহাড়ে অবতরণ করতাম তাহলে তা আল্লাহর ভয়ে ভেঙে চুরমার হয়ে যেতে দেখতে। সুতরাং তা এমন দৃষ্টান্ত যা আমি মানুষের জন্য উপস্থাপন করি যাতে তারা চিন্তা-ফিকির করতে পারে।^২

শুধু স্বজাতির দরদ ও ফিকিরের কারণে আল্লাহ তাআলা কুরআনে কারিমে ছোট্ট একটি প্রাণীর নামে সূরা অবতীর্ণ করেছেন। এখন প্রশ্ন হতে পারে আমরা যদি এই যুগে উম্মতের দরদ ও ফিকির করি তাহলে আমাদের নাম কোথায় আসবে? এখন তো আর কুরআন নাজিল হবে না। উত্তর হলো, আমরা যদি এখলাসের সাথে উম্মতের ফিকির করি তাহলে ইনশাআল্লাহ আল্লাহ তাআলা আগত উম্মতের অন্তরে আমাদের নাম লিখে দেবেন। এক্ষেত্রে পাঠকের সামনে কয়েকটি ঘটনা পেশ করছি।

^১ ইয়াসিন-২১

^২ হাশর-২১

খাজা মঈনুদ্দীন চিশতী র.এর ঘটনা

খাজা মঈনুদ্দীন চিশতী রহ. কে? এমন খুব কম লোকই আছে যারা তাঁকে চিনে না। এখনও অনেক মানুষ ঢাকাতে তার নাম বিক্রি করে রোজগার করে নিজেদের পকেট ভারী করে। দেখবেন, রজব মাস এলেই ঢাকা শহরের মোড়ে মোড়ে লালসালু দিয়ে আবৃত একটি ডেক দেখা যায় সেখানে লেখে রাখা থাকে ‘খাজা বাবার ডেক’। মানুষের কাছে তাঁর নাম বলে টাকা সংগ্রহ করা হয়। মঈনুদ্দীন চিশতী রহ.এর মাজারে গেলে দেখবেন হিন্দু-মুসলিম সকলেই সেখানে যাচ্ছে। মুসলিম-অমুসলিম সকলের অন্তরে তিনি জায়গা করে নিয়েছেন। কেন সে সময়ের কোনো বাদশার কথা তো মানুষ স্মরণ করে না। স্মরণ করা হয় না ঐ যুগের কোনো আলেমের কথা। তাহলে এর কারণ কী? কেন তাকে এরূপ স্মরণ করা হয়? কী তার রহস্য? এসবের উত্তর হলো তাঁর অন্তরে ছিল উম্মতের দরদ।

একবার খাজা মঈনুদ্দীন চিশতী রহ. এর শায়েখ খাজা উসমান হারুনী রহ. উনার কাছে এলেন। আগের যুগে মাশায়েখগণ মাঝে মাঝে মুরিদদের এসলাহের জন্য তাদের কাছে আসতেন। মুরিদের কাছে থাকা শুরু করলেন শায়েখ। এসলাহ করতে লাগলেন। একদিন শায়েখ খাজা উসমান হারুনী রহ. মঈনুদ্দীন চিশতী রহ. কে বললেন। বলার সময়টা ছিল নীরব। কেউ ছিল না কাছে। শুধু মঈনুদ্দীন চিশতী রহ.কে সম্ভবত পরীক্ষার জন্য বলেছেন। শায়েখ বললেন, আগামীকাল যারা আমার পেছনে ফজরের নামাজ আদায় করবে তারা জান্নাতী। আর যে ব্যক্তি এই খবর অন্য কারো কাছে বলবে সে জাহান্নামি। মঈনুদ্দীন চিশতী রহ. খুবই চিন্তায় পড়ে গেলেন। কী করবেন? শেষে শায়েখকে শুইয়ে দিয়ে উনি বের হয়ে গেলেন মানুষের দুয়ারে দুয়ারে। সারা রাত মানুষের বাড়ি বাড়ি গিয়ে বললেন ‘ভাই তোমরা আগামীকাল সকালে ফজরের নামাজ আমার শায়েখের পেছনে পড়বে। তোমরা জান্নাতি হয়ে যাবে, এভাবে পুরো রাত মানুষের দুওয়াওে দুওয়াওে ঘুরলেন এবং তাহাজ্জুদের পূর্বে শায়েখের কাছে এসে হাজির হলেন। ফজরের নামাজে মসজিদ কানায় কানায় ভরপুর, লোকে লোকারণ্য। নামাজ শেষে শায়েখ বললেন, মঈনুদ্দীন এখানে আজ এতো লোক কেন? অন্য দিন এতো লোক তো নামাজে আসে না। মঈনুদ্দীন রহ. বললেন হজরত! আপনি না বলেছেন যারা আপনার পিছনে ফজরের নামাজ পড়বে তারা জান্নাতি। এসকল লোক জান্নাতের আশায় নামাজ পড়তে এসেছে। শায়েখ বললেন এখবর তাদেরকে কে দিয়েছে? তুমি ছাড়া তো এই খবর আর কেউ জানে না। অবশ্যই তুমি দিয়েছে? শায়েখ বললেন, তুমি কি জানো না, যে ব্যক্তি এখবর অন্যের কাছে পৌঁছে দেবে সে জাহান্নামি। মঈনুদ্দীন রহ. বললেন হুজুর বিষয়টি নিয়ে আমি অনেক ভেবেছি, চিন্তা-ভাবনা করে সিদ্ধান্ত নিলাম আমার মতো এক মঈনুদ্দীন যদি জাহান্নামে গিয়ে হাজারো মানুষ জান্নাতি হয়ে যায়, তাহলে মনে হয় আমার অন্তর শান্তি পাবে। এই ছিল উম্মতের দরদ। শায়েখ খুব দুআ করলেন। বললেন যাও তুমি যদিকে যাবে সেদিকে মানুষ জান্নাতি হবে। তোমার হাতে মানুষ দলে দলে মুসলমান হবে। এর পরেই তো উনার হাতে এক সফরে ৯০ হাজার মানুষ ইসলাম কবুল করেন। উম্মতের প্রতি দরদ ও ভালোবাসার ফিকির করার কারণে আজও আমাদের অন্তরে আল্লাহ তাআলা তাঁর নাম লিখে দিয়েছেন। আজও আমরা মঈনুদ্দীন চিশতীকে স্মরণ করি। এবং তাঁকে নিয়ে আলোচনা করি।

আরকেজন হলেন শায়েখ হযরতজি ইলিয়াস রহ., আজ সারা বিশ্ব তাঁকে চিনে। বিশ্বের মানুষের অন্তরে স্থান করে নিয়েছেন। কেন? কী তার কারণ? তার একমাত্র কারণ হলো উম্মতের প্রতি তার দরদ। উম্মত নিয়ে তার ফিকির। তিনি অস্থির থাকতেন উম্মত নিয়ে। রাতে ঘুমাতে পারতেন না। রাতে বারান্দায় পায়চারি করতেন। আর বলতেন কী হবে মানুষের? আহ! কী হবে এই জাতির? তার এই ফিকিরের কারণে আল্লাহ তাআলা আমাদের অন্তরে তার নাম লিখে দিয়েছেন।

শাহজালাল ইয়ামানি রহ. আজ আমরা তার নাম, তাঁর কথা স্মরণ করি। তাঁর বাড়ি তো বাংলাদেশে নয়। তিনি হলেন ইয়ামেনের মানুষ। কী কারণে বাংলায় এলেন? উম্মতের ফিকিরে, উম্মতের দরদে। তাই আজও আমাদের অন্তরে তিনি গাঁথে আছেন। আছেন আমাদের হৃদয়ের মণিকোঠায়। এ ধরনের তালিকা যদি তৈরি করা যায় তাহলে সেই তালিকা দিয়েই একটি বই হয়ে যাবে। আজ এখানেই সমাপ্তি টানলাম।

দলিল

হিন্দ ইবনে আবি হালা রাসুল সাল্লাল্লাহু আলাইহি ওয়াসাল্লামের কথা বার্তার বর্ণনা দিতে গিয়ে বলেন- -

كان رسول الله صلى الله عليه وسلم متواصلاً بالأحزان، دائم الفكرة

রাসুল সাল্লাল্লাহু আলাইহি ওয়াসাল্লাম সর্বদা উম্মতের ফিকির করতেন।^৩

কেমন ছিল নবীজির দরদ ও উম্মতের ফিকির। তিনি উম্মতের ফিকিরে এতো অস্থির থাকতেন, আল্লাহ তাআলা তাঁকে সাব্বানা দিতে গিয়ে আয়াত অবতীর্ণ করলেন-

لَعَلَّكَ بَاخِعٌ نَفْسَكَ أَلَّا يَكُونُوا مُؤْمِنِينَ

তারা কেন মুমিন হচ্ছে না এই জন্য আপনি মনে হয় আপনার জীবনকে ধ্বংস করে দেবেন।^৪

সে সময় কারা মুমিন হচ্ছিল না? মুসলিমরা না অমুসলিমরা? অবশ্যই অমুসলিমরা। অমুসলিমরা কেন মুসলিম হচ্ছে না এই জন্য নবীজি এতো অস্থির ছিলেন আল্লাহ তাআলা সাব্বানা দিচ্ছেন। আমরা কেমন দায়ী? আমরা কেমন অনুসারী? আমাদের কি একটিবার এই ফিকির হয়েছে যে অমুসলিমরা চিরস্থায়ী জাহান্নামে ঝাঁপ দিচ্ছে। তাদেরকে কি ভাবে এই আগুন থেকে বাঁচানো যায়। অমুসলিমদের মাঝে দাওয়াতের ফিকির করবো তো দূরের কথা, কেউ যদি মুসলমান হতে আসে তাহলে কালেমা পড়াতেও আমরা ভয় পাই। আল্লাহ তাআলা আমাদেরকে সহীহ বুঝ দান করুন। আমিন।

উম্মতের ফিকিরের একটি ঘটনা

একবার রাসুল সাল্লাল্লাহু আলাইহি ওয়াসাল্লাম সাহাবাদের নিয়ে বসে ছিলেন। এমন সময় তাদের সামনে দিয়ে এক ইয়াহুদীর লাশ নিয়ে যাওয়া হচ্ছিল। লাশ দেখে রাসুল সাল্লাল্লাহু আলাইহি ওয়াসাল্লামের চোখ মুবারক দিয়ে অশ্রু ঝরছিল। তিনি কাঁদতে লাগলেন। সাহাবায়ে কেরাম রা. জিজ্ঞাসা করলেন, ইয়া রাসুলাল্লাহ সাল্লাল্লাহু আলাইহি ওয়াসাল্লাম! আপনি কাঁদছেন কেন? এটা তো একজন ইয়াহুদীর লাশ। দরদি নবী সাল্লাল্লাহু আলাইহি ওয়াসাল্লাম উত্তরে বললেন, দেখ সে তো আমার উম্মত। আমি তো তাকে চিরস্থায়ী জাহান্নাম থেকে রক্ষা করতে পারলাম না। এই ছিল উম্মত নিয়ে আমাদের প্রিয় নবীজির ফিকির। আমরা কয়দিন এই অমুসলিমদের হেদায়াতের ফিকির করেছি। কয়দিন তাদের হেদায়াতের জন্য আল্লাহর কাছে দু'আ করেছি। কয় ফোটা অশ্রু তাদের জন্য ঝরিয়েছি?

কুতুব হতে চাও?

হাজী এমদাদুল্লাহ মুহাজিরে মক্কি রহ. একবার তার শিষ্যদের বললেন- তোমরা কি কুতুব হতে চাও? সকলে বললেন কে আবার কুতুব হতে চায় না। বললেন, আমি কি তোমাদেরকে কুতুব হওয়ার পদ্ধতি বলে দেব? সমস্বরে বললেন, জ্বি বলুন। হাজী সাহেব বললেন, যদি কোনো অমুসলিমকে মৃত্যুবরণ করতে দেখ তাহলে এক কোণে গিয়ে কিছু সময় কান্নাকাটি কর। আর আল্লাহকে বল। আমি তো তাকে দাওয়াত দিতে পারিনি। তাহলে তুমি কুতুব হয়ে যাবে।

কুকুর প্রতিপালন নিষেধ

হাদিস শরিফে আছে 'যেই ঘরে কুকুর বা ছবি থাকে ওই ঘরে রহমতের ফেরেশতা প্রবেশ করে না।' প্রশ্ন হলো ঘরে কুকুর রাখা নিষেধ কেন? কুকুরের মধ্যে অনেক ভালো গুণ আছে, এসব গুণগুলোর ওপর আমল করলে একজন মানুষ আল্লাহর বড় ওলী হয়ে যাবে। এর পরও কুকুর প্রতিপালন করা নিষেধ। এর কারণ হলো কুকুরের মধ্যে এমন একটি

^৩ গ্রন্থঃ সহীহ শামায়েলে তিরমিযী / অধ্যায়ঃ ৩৪. রাসুলুল্লাহ (ﷺ) এর বাচনভঙ্গি (باب كيف كان كلام رسول الله ﷺ)

হাদিস নম্বরঃ ১৬৭।

^৪ সূরা শুআরা-৩

দোষ আছে যা মানুষের মধ্যে যেন না আসে। মানুষের সাথে থেকে যেন মানুষের মধ্যে তা প্রকাশ না পায়। আর সেই দোষটি হলো তার মধ্যে স্বজাতির প্রতি কল্যাণকামিতা না থাকা। উদাহরণস্বরূপ একটি মাঠে মরা একটি গরু রেখে দেওয়া হলো, একটি কুকুর সেই গরুটি খাচ্ছে, এমন সময় যদি অন্য একটি কুকুর আসে তাহলে সেই কুকুর আগত কুকুরকে আর খেতে দিবে না। অর্থাৎ তার জাতির প্রতি তার কোনো ভালোবাসা নেই। এই কারণেই তাকে মানুষের সাথে থাকা নিষেধ করা হয়েছে। পক্ষান্তরে একটি ছাগল তার উল্টো। অধিকাংশ নবী ছাগল চরিয়েছেন। ছাগলের মধ্যে অনেক উল্টাপাল্টা আছে, এদিকে যায় আবার ঐদিকে যায়, এরপরও তার মধ্যে এমন এক গুণ আছে তা হলো তার স্বজাতির প্রতি ভালোবাসা। সে স্বজাতির কল্যাণকামী। ছাগলের সামনে একটি কাঁঠালের পাতার ডাল রেখে দেবেন, দেখবেন সকলে মিলেমিশে সেই পাতাগুলো ভাগ করে খেয়ে ফেলবে। উম্মতের দরদ আল্লাহর কাছে এত প্রিয়।

ভাই! আমরা হলাম মানুষ। মানবতা থেকে মানুষ। উনুসুন থেকে ইনসান। যে অন্যের কল্যাণে এগিয়ে যাবে, তাকে মানুষ বলে। আমাদের প্রতিবেশী কোনো হিন্দু বাড়িতে যদি আগুন লাগে তাহলে মুসলমানরা দৌড়ে যাবে আগুন নেভাতে ঝাপিয়ে পড়বে। কোনো মুসলমান বাড়িতে আগুন লাগলে অমুসলিমরাও দৌড়ে আসবে আগুন নেভাতে। এই দুনিয়ার আগুনে যদি ঘর-বাড়ি পুড়ে যায়, তাহলে উত্তম ঘর-বাড়ি বানিয়ে দেয়া সম্ভব। চামড়া বা তুক পুড়ে গেলে ওষুধ দিয়ে তুক ফিরিয়ে আনা সম্ভব। কিন্তু এই অমুসলিম ভাইটি মারা গেলে চিরকাল আগুনে জ্বলবে। যার শুরু আছে কিন্তু শেষ নেই। সেই আগুন থেকে বাঁচানো অসম্ভব। আমরা কি একটিবার ফিকির করেছি? ভেবেছি কি তাদেরকে আগুন থেকে বাঁচাতে হবে? কেমন মানুষ আমি? কেমন মানবতা আমার? আমার এক ভাই চিরকালের জন্য জাহান্নামে ঝাঁপ দিলো আমি একটি বারও ফিকির করলাম না। বরং রাসুল রাসুল সাল্লাল্লাহু আলাইহি ওয়াসাল্লামের এই সিফাত ছিল যে, তিনি সর্বদা উম্মত নিয়ে ফিকির করতেন। আল্লাহ তাআলা আমাদেরকে এই উম্মতের ফিকির করার তাওফিক দান করুন। আমিন।

আরাম প্রিয় না হওয়া

দায়ীরা একটি গুণ হলো আরামপ্রিয় হবে না। আরামপ্রিয় হলে দাওয়াতি কাজ খুবই মুশকিল হয়ে যাবে। আমাদের আদর্শ প্রিয়নবী সাল্লাল্লাহু আলাইহি ওয়াসাল্লাম কখনো বিলাসিতা পছন্দ করতেন না। তাঁর কাছের লোকদের জন্যও পছন্দ করতেন না। একবার ফাতেমাতুয্জাহরা রা. হুজুর সাল্লাল্লাহু আলাইহি ওয়াসাল্লামের কাছে এসে বললেন, আব্বা! আমার আটা পিষতে ও পানি ওঠাতে কষ্ট হয়। দয়া করে আমাকে যদি একজন সেবিকা হাদিয়া দিতেন তাহলে খুব ভালো হতো। রাসুলুল্লাহ সাল্লাল্লাহু আলাইহি ওয়াসাল্লাম বললেন, তুমি প্রত্যেক নামাজের পর ৩৩ বার সুবহানাল্লাহ, ৩৩ বার আলহামদুলিল্লাহ এবং ৩৪ বার আল্লাহু আকবার বলবে।^৫

এই ছিল আমাদের প্রিয়নবী সাল্লাল্লাহু আলাইহি ওয়াসাল্লামের পরিবারের আরামপ্রিয়তা। নবীজি সাল্লাল্লাহু আলাইহি ওয়াসাল্লাম ইচ্ছা করলে নিজ কন্যাকে একজন সেবিকা দিয়ে দিতে পারতেন। কিন্তু তা করেননি। নিজের জন্য ও আরাম পছন্দ করতেন না। নিজ পরিবারের জন্যও আরাম পছন্দ করতেন না। আমাদের অবস্থা হলো আমরা আরাম আয়েশ ছাড়া কিছুই বুঝি না। আমাদের সকল চেষ্টা সাধনা একটু আরামের জন্য। যে যেই অবস্থায় আছি, এর থেকে আরো একটু ভালো অবস্থানে থাকতে চাই। চাই আরো একটু বেশি আরাম করতে। কাঁচা বাড়ি থাকলে মন চায় বাড়িটা পাকা করতে। পাকা হলে মন চায় বিল্ডিং বানাতে। বিল্ডিং হলে আশা জাগে এসি সংযোগ করতে। মোট কথা, আমাদের জীবনের লক্ষ্যবস্তু হলো আরা- আয়েশ। কিন্তু যার অনুসরণ করলে আমি আল্লাহকে পাবো, যার পূর্ণাঙ্গ অনুসরণ করলে আমাকে ক্ষমা করে দেওয়া হবে, সেই অনুসরণীয় ব্যক্তি আমাদের প্রিয়নবী হজরত মুহাম্মাদ সাল্লাল্লাহু আলাইহি ওয়াসাল্লামের কোনো আরাম-আয়েশ ছিল না। নিজের কন্যাকেও আরাম আয়েশ দিতে চাননি। আমরা আমাদের মেয়েদের বিয়ে দেওয়ার সময় লক্ষ রাখি, যেখানে বিয়ে দেব, তাদের পরিবারের সদস্য সংখ্যা যেন কম

^৫(মুসলিম ২১৩৭)

হয়। কারণ ফ্যামেলি বড় হলে কাজ বেশি করতে হবে। এসব দিক বিবেচনা করে সেই পরিবারে মেয়েকে বিয়েই দিই না। বিয়ে-শাদি ঠিক হলেও মেয়েদের যেনো কষ্ট না করতে হয়। বেশি যেন আরামে থাকতে পারে। সে জন্য সাথে ওয়াশিং মেশিন, ফ্রিজ ইত্যাদি সামগ্রী সাথে দিয়ে দেওয়া হয়। আমরা চাই নিজেরা আরামে থাকবো। আমার কন্যাও যেন পরের বাড়ি গিয়ে কষ্ট না করে। সেখানেও যেন আরামে থাকে। এই চিন্তা-ভাবনা আমার নবীজির অনুসরণ নয়। আসুন আমরা দুনিয়ার আরাম ত্যাগ করি। আখেরাতের আরামের ফিকির করি।

অনেক সময় আমরা দাওয়াতি সফরে যাই, সেখানেও আমরা আরাম খুঁজি। এসি বাস আছে কি না, ভালো গাড়ির টিকেট তো আছেই, পারলে বিমানের টিকেট। আল্লাহকে পেতে যাচ্ছি সেখানেও আরাম খুঁজি। যা আমার নবীজির অপছন্দ।

দায়ী ভাইদের প্রতি আমার অনুরোধ, আসুন! আমরা প্রতিজ্ঞা করি, আজ থেকে আরামকে ত্যাগ করবো। কাজকে প্রাধান্য দেবো। আল্লাহকে খুশি করবো। পরকালের আরামের প্রত্যাশা করবো। শুধু একটু আরামের জন্য তাহাজ্জুদ ছুটে যায়। জামাত ছুটে যায়। আরামকে ত্যাগ করে তাহাজ্জুদ ও জামাতের পাবন্দি করার চেষ্টা করবো। আরামকে ত্যাগ করে বেশি বেশি তরজমাসহ কুরআন তেলাওয়াত করব আল্লাহ আমাদেরকে তাওফিক দান করুন।

একটি নসিহত

দায়ী ভাইদের প্রতি আমার একটি আবেদন-উপদেশ বা নসিহত যে যেভাবেই নেন না কেন, সেটি হলো অল্প একটু অস্থায়ী আরাম আয়েশের জন্য, আরামের জন্য গুনাহ করবো না। কারণ আরাম শেষ হয়ে যাবে। গুনাহের মজাও শেষ হয়ে যাবে, কিন্তু গুনাহ সাথে থেকেই যাবে। এই গুনাহ আমার সাথে কবরে থাকবে, হাশরে থাকবে, বিচার দিনে থাকবে, শেষে আমাকে জাহান্নামে নিয়ে রেখে আসবে। অল্প একটু কষ্টের জন্য সাওয়াবের কাজ ছেড়ে দিবনা। কারণ কষ্ট শেষ হয়ে যাবে। সওয়াব তোমার সাথে থাকবে, কবরে থাকবে, হাশরে থাকবে, বিচারের সময় থাকবে, শেষ পর্যন্ত তোমাকে জান্নাতে রেখে আসবে। আল্লাহ আমাদেরকে এই উপদেশের ওপর আমল করার তাওফিক দান করুন।

দলিল

হজরত হিন্দ ইবনে আবি হালা রা. রাসুল সাল্লাল্লাহু আলাইহি ওয়াসাল্লামের সিফাত বর্ণনা করতে গিয়ে বলেন-

لَيْسَتْ لَهُ رَاحَةٌ

‘তার কোন আরাম ছিলোনা।’

অমুসলিমদের দাওয়াত দেয়ার ইসলামের বিধান কী?

এপর্যায়ে আমরা আলোচনা করবো অমুসলিমদেরকে দাওয়াত দেয়ার শরয়ী বিধান কি? ফরজে আইন, ফরজে কেফায়া, না সুন্নাত। নিম্নের আলোচনা থেকে আশা করি বিষয়টি স্পষ্ট হয়ে যাবে।

ফরজে আইন

অমুসলিমদের মাঝে দাওয়াতী কাজ ঐ সময় ফরজ হবে যখন কুফর বিজয়ী থাকবে, সত্য পরাজিত থাকবে, দাঈর সংখ্যা হবে নিতান্তই কম, মন্দকাজ হবে ব্যাপক, মুর্থতা ও অজ্ঞতা সর্বস্তরে বিরাজ করবে। এমতাবস্থায় ব্যক্তিগতভাবে সাধ্যানুযায়ী অমুসলিমদের মাঝে দাওয়াত ফরজে আইন।

সুন্নাত

অমুসলিমদের মাঝে দাওয়াতী কাজ ঐ সময় সুন্নাত হবে, যখন দাঈদের সংখ্যা থাকবে পর্যাপ্ত। দাওয়াতী সংঘঠন

১ গ্রন্থঃ সহীহ শামায়েলে তিরমিযী / অধ্যায়ঃ ৩৪. রাসূলুল্লাহ (ﷺ) এর বাচনভঙ্গি (باب كيف كان كلام رسول الله ﷺ)

হাদিস নম্বরঃ ১৬৭।



চতুরদিকে ছড়িয়ে পরবে। হক বিজয়ী থাকবে। বাতিল থাকবে পরাজিত। রাষ্ট্র নিজেই দাওয়াতী কাজ আঞ্জাম দিবে। এই অবস্থায় সাধারণ মানুষের উপর দাওয়াতী কাজ করা সুন্নাত।

ফরজে কেফায়া

ওলামায়ে কেরাম এ ব্যাপারে একমত যে, অমুসলিম ভাই-বোনদেরকে ইসলামের দাওয়াত দেয়া ফরজে কেফায়া। অনেকে বলেছেন সাধ্যানুযায়ী ফরজে আইন। আমরা ফরজে কেফায়াই ধরে নিলাম। এবার আমাদের জানতে হবে ফরজে কেফায়া কাকে বলে?

ফরজে কেফায়া বলা হয় এমন ছুকুম বা কাজ, যা সকল মুসলমানের উপর ফরজ। তবে সকলের পক্ষ থেকে যদি কিছু মানুষ ওই কাজ আদায় করে দেয়, তাহলে সকলের পক্ষ থেকে আদায় হয়ে যাবে এবং আল্লাহর পক্ষ থেকে শাস্তিপ্রাপ্ত হবে না। যদি আদায় না করো তাহলে সকলেই গুনাহগার হবে।

সাধারণত ফরজে কেফায়া বলতে আমরা জানাজার নামাযকে বুঝি। কাফন দাফনসহ জানাজার নামায সম্পূর্ণ করতে হলে কমপক্ষে চারজন লোকের প্রয়োজন। একজন ইমাম হলে, বাকি তিনজন মুক্তাদি। দাফনের জন্য কবরের উপরে থাকবে দু'জন। আর লাশটি কবরে নামানোর জন্য কবরে থাকবে দু'জন। মোট কথা, কাফন-দাফন সম্পন্ন হতে হলে মোট চারজন লোকের প্রয়োজন। তাহলে ফরজে কেফায়া আদায় হবে। যদি ফরজে কেফায়া আদায় না হয়, তাহলে ওই মহল্লার সকলেই গুনাহগার হবে এবং সমাপ্ত করার দায়িত্ব পড়বে পার্শ্ববর্তী সকল মুসলমানের উপর। যদি তারাও আদায় না করে, তাহলে পর্যায়েক্রমে সকল মুসলমান গুনাহগার হবে। তদ্রূপ অমুসলিমদের কাছে ইসলামের দাওয়াত পৌঁছানো হলো ফরজে কেফায়া। প্রত্যেক অমুসলিমের কাছে দাওয়াত পৌঁছানোর জন্য এমন কিছু লোক থাকতে হবে। যাদের মাধ্যমে তাদের কাছে দাওয়াত পৌঁছে যায়। যদি সকলের কাছে দাওয়াত না পৌঁছে, তাহলে সকল মুসলমান গুনাহগার হবে।

জানাজার নামাযের সাথে মিলালে বোঝা যায়, প্রত্যেক এলাকায় কমপক্ষে চার জন ব্যক্তি এমন থাকতে হবে, যারা সর্বদায় অমুসলিমদেরকে ইসলামের দাওয়াত দিবে। যদিও চারজন দ্বারা দাওয়াতের ফরজে কেফায়া আদায় হবে না।

প্রিয় পাঠক! এবার আপনার কাছে আমার প্রশ্ন, আপনি বলুন তো দেখি! আপনার এলাকায় (আপনি যে অঞ্চলেরই হোন না কেন।) এমন চারজন ব্যক্তি আছে, যারা সর্বদা অমুসলিমদের দাওয়াত দিচ্ছেন? যদি এলাকায় না থাকে তাহলে আপনার পুরো জেলায় এমন চারজন মানুষ আছে কি, যারা সর্বদা সকল মুসলমানদের পক্ষ থেকে অমুসলিমদেরকে দাওয়াত দিচ্ছেন? যদি উত্তর 'না' হয়, তাহলে বলুন, আমরা কি ফরজে কেফায়া আদায় করছি? যদি আদায় না করে থাকি তাহলে আমরা কি গুনাহগার হচ্ছি না? অবশ্যই হচ্ছি। আর কতদিন এই ফরজে কেফায়া ছেড়ে দেয়ার গুনাহ মাথায় নিয়ে ঘুরবো? যদি কোন ব্যক্তি এককভাবে দাওয়াত দেয়ার চেষ্টা করতে থাকে, তাহলে উক্ত ব্যক্তি নিজে গুনাহ থেকে বেঁচে যাবে। কিন্তু সমষ্টিগতভাবে সকলেই গুনাহগার হবে।

জিম্মাদারী আদায়ের পদ্ধতি

দাওয়াতী কাজ যেহেতু আমাদের উপর ফরজ। এই কাজ আমাদের করতেই হবে। এখন প্রশ্ন হলো - কীভাবে করবো? সবাই কি একসাথে দাওয়াত দিবে? সাধ্য ও যোগ্যতা অনুযায়ী একেক জনের কাজের ধরণও ভিন্ন হবে। বিষয়টি বুঝার সুবিধার্থে কুরআন থেকে তিনটি উদাহরণ পেশ করছি। আল্লাহ্ তা'আলা সূরা নামলের মাঝে দুইটি প্রাণীর আলোচনা করেছেন।

পিপীলিকা:

সুলাইমান - এর ঘটনায় আল্লাহ্ তা'আলা বলেছেন, সুলাইমান যখন সৈন্যদের নিয়ে যাচ্ছিলেন, পথে এক স্থানে

পিপীলিকার দল গর্ত থেকে বাইরে বের হয়ে এসেছিল। পিপীলিকার রাণী যখন বুঝতে পারলো যে তারা সুলাইমান আ. এর সৈন্য দলের পায়ের নিচে পরে পিষ্ট হয়ে যাবে। তখন রাণীপিপীলিকার দলকে ডাক দিয়ে বললো তোমরা তোমাদের গর্তে প্রবেশ কর। অন্যথায় তোমরা সুলাইমান আ. এর সৈন্যের পদদলিত হয়ে পিষ্ট হয়ে যাবে।^৭

কুরআনে করীম পিপীলিকাদের রাণীকে দাঈ হিসাবে পেশ করেছে। কতো ছোট একটি প্রাণী! তার অন্তরে ছোট একটি ব্যথিত হৃদয়! তার মধ্যে নিজ জাতিকে বিপদ থেকে বাঁচানোর কতো ফিকির। সে কোন মাধ্যম ছাড়াই সরাসরি নিজ জাতিকে বিপদ থেকে বাঁচানোর ফিকির করেছে।

কিন্তু আমরা দেখছি আমাদের জাতি ঝাপ দিচ্ছে চিরস্থায়ী জাহান্নামের দিকে। প্রতি মুহুর্তে পা ফেলছে ধ্বংসের দিকে। এব্যাপারে আমাদের কোন ফিকির নেই।

হৃদহৃদ পাখি:

আল্লাহ তা'আলা সূরা নামলে হৃদহৃদ পাখির ঘটনা আলোচনা করেছেন। হৃদহৃদ পাখি মূলকে সাবায় গেল। গিয়ে দেখল ওই দেশের রাণী বিলকিস এবং তার পুরো জাতি আল্লাহ তা'আলাকে ছেড়ে সূর্যের পূজা করছে। পাখি অস্থির হয়ে গেল। সে সরাসরি ওখানে লোকদের বুঝাতে পারলো না। কারণ তার ভাষা ভিন্ন, আর ওই দেশের ভাষাই ভিন্ন। পাখির ভাষা তারা বুঝতে পারতো না। সুলাইমান আ. পাখিদের ভাষা জানতেন। তাদের কথা বুঝতেন। তাই পাখি সুলাইমান আ. এর দরবারে উপস্থিত হয়ে প্রতিবেশী দেশের খবর দিলো। বলল সেখানে শিরক হচ্ছে। ফলে আপনি দ্রুত কোন পদক্ষেপ নিন। সুলাইমান আ. হৃদহৃদের কথা শুনে খবরটি যাচাই-বাছাই করলেন। এরপর রাণী বিলকিসের কাছে দাওয়াতী পত্র পাঠালেন। এর ফলে রাণী বিলকিস ইসলামের ছায়াতলে আশ্রয় নেয়।^৮

একটি সাধারণ পাখির প্রচেষ্টায় একটি দেশের রাণী ইসলাম কবুল করেছে। এর দ্বারা আমরা শিক্ষা অর্জন করতে পারি, আমরা যদি নিজে কোন কারণে দাওয়াতী কাজ না করতে পারি, তাহলে এমন লোককে এই কাজে নিয়োগদেব, যে এই কাজ আঞ্জাম দিতে পারবে। আমরা যদি মাদ'উর ভাষা না বুঝি তাহলে মাদ'উর ভাষায় ইসলামী পুস্তিকা বই এবং কুরআন ইত্যাদি প্রকাশ করে বিতরণ করতে পারি।

আমাদের দেশে খ্রিস্টানরা বিভিন্ন বই পুস্তক বিতরণ করে। যেখানে সেখানে ইঞ্জিল বিতরণ করে। এসকটি নামে ডাক যোগে বই ও প্রচারপত্র বিতরণ করে। এই কাজের জন্য তারা নির্দিষ্ট লোক নিয়োগ দিয়েছে। তারা এর জন্য চেষ্টা মেহনত চালিয়ে যাচ্ছে। এতে সফলতাও অর্জন করেছে। যা আমাদের করার ছিল তা আমরা করছি না।

প্রিয় পাঠক! বলুন তো এপর্যন্ত কয়জন অমুসলিমের কাছে কয়টি বই বা কুরআন বিতরণ করেছেন? নিজেরা সরাসরি দাওয়াত না দিতে পারলে কমপক্ষে বই পুস্তক বা পত্রের মাধ্যমে খুব সহজেই দাওয়াত দিতে পারি।^৯

আসহাবে কাহাফের কুকুর:

সূরা কাহাফে আল্লাহ তা'আলা আসহাবে কাহাফের কুকুরের দৃষ্টান্ত পেশ করেছেন। সেই সাত যুবক যুগের বাদশার সামনে হকের আওয়াজ উঠে করে ছিল। ফলে পুরো রাষ্ট্র তাদের দুষমন হয়ে যায়। তারা তাদের জাতি থেকে দূরে এক স্থানে এসে একটি পাহাড়ের গুহায় আশ্রয় নেয়। তাদের সাথে ছিল একটি কুকুর, যা তাদের পাহারা দিচ্ছিলো।

এর দ্বারা বুঝাগেল যে, কেউ যদি নিজে দাওয়াতী কাজ না করতে পারে অন্যকে দিয়েও করাতে পারছে না তাহলে কমপক্ষে দাঈ ইলাল্লাহর সহযোগী ও পাহারাদারী হিসাবে কাজ করবে। দাঈদের প্রয়োজন মিটানোর চেষ্টা করবে।

দাওয়াত ফরজ হওয়ার ব্যাপারে দলিল হিসাবে যে সকল আয়াত পেশ করা হয় তার মধ্যে কয়েকটি নিম্নে পেশ করা

সূরা নামল-১৮^৭

নামল ২০-৪০^৮

আলহামদুলিল্লাহ হিলফুল ফুয়ুল প্রকাশনী থেকে দাওয়াতী কিছু বই প্রকাশিত হয়েছে আপনারা চাইলে সেখান থেকে সংগ্রহ করে^৯
অমুসলিমদের মাঝে বিতরণ করতে পারেন।

হলো-

তোমরাই হলে সর্বোত্তম
 أُمَّةٌ أُخْرِجَتْ لِلنَّاسِ تَأْمُرُونَ بِالْمَعْرُوفِ وَتَنْهَوْنَ عَنِ الْمُنْكَرِ وَتُؤْمِنُونَ بِ
 উম্মত, মানবজাতির কল্যাণের জন্যেই তোমাদের উদ্ভব ঘটানো হয়েছে। তোমরা সংকাজের নির্দেশ দান করবে ও অন্যায়
 কাজে বাধা দেবে এবং আল্লাহর প্রতি ঈমান আনবে।^{১০}

فُلْ هَذِهِ سَبِيلِي أَدْعُو إِلَى اللَّهِ عَلَى بَصِيرَةٍ أَنَا وَمَنِ اتَّبَعَنِي وَسُبْحَانَ اللَّهِ وَمَا أَنَا مِنَ الْمُشْرِكِينَ

বলে দিন এটাই আমার পথ। আমি জেনে-বুঝে আল্লাহর দিকে দাওয়াত দেই এবং আমার অনুসারীরাও। আল্লাহ্পবিত্র,
 আমি অংশীবাদীদের (শিরককারীদের) অন্তর্ভুক্ত নই।^{১১}

এই আয়াতে সকল উম্মতের উপর দাওয়াতের জিম্মাদারী দেয়া হয়েছে। ইমাম গাজালী রহ. একস্থানে লিখেছেন, যদি
 কোন এলাকায় কোন কাফের মারা যান, তাহলে সকল মুসলিম জিজ্ঞাসিত হবে।

وَادْعُ إِلَى رَبِّكَ وَلَا تَكُونَنَّ مِنَ الْمُشْرِكِينَ

কাফেররা যেন আপনাকে আল্লাহর আয়াত থেকে বিমুখ না করে। সেগুলো আপনার প্রতি অবতীর্ণ হওয়ার পর আপনি
 আপনার পালনকর্তার প্রতি দাওয়াত দিন এবং কিছুতেই মুশরিকদের দলভুক্ত হবেন না।^{১২}

وَمَا كَانَ الْمُؤْمِنُونَ لِيَنفِرُوا كَافَّةً فَلَوْلَا نَفَرَ مِنْ كُلِّ فِرْقَةٍ مِنْهُمْ طَائِفَةٌ لِيَتَفَقَّهُوا فِي الدِّينِ وَلِيُنذِرُوا قَوْمَهُمْ إِذَا
 رَجَعُوا إِلَيْهِمْ لَعَلَّهُمْ يَحْذَرُونَ

আর সমস্ত মুমিনের অভিযানে বের হওয়া সঙ্গত নয়। তাই তাদের প্রত্যেক দলের একটি অংশ কেন বের হলো না,
 যাতে দ্বীনের জ্ঞান লাভ করে এবং সংবাদ দান করে স্বজাতিকে, যখন তারা তাদের কাছে প্রত্যাবর্তন করবে, যেন তারা
 বাঁচতে পারে।^{১৩}

^{১০}আলে ইমরান-১১০

^{১১}ইউনুস -১০৮

^{১২}কাসাস-৮৭

^{১৩}তাওবা-১২২